

1.UVOD

U posleratnom periodu, a shodno činjenici da se društvo našlo u tranziciji, stvorila se realna potreba za uspostavljanjem jedinstvenog Bankarskog sistema na državnom nivou koji će biti spreman odgovoriti izazovima, u tom momentu, nadolezećeg vremena. Politička situacija u tom momentu je vidno bila diktirana od strane međunarodnih faktora što je dovelo do postavljanja pred domaće političke faktore veoma radikalnih uslova koje je u tom momentu bilo neophodno ispuniti kako bi uopšte došlo do formiranja Centralne banke Bosne i Hercegovine. Potreba formiranja odnosno uspostavljanja bankarskog sistema koji će u načelu imati jednu ovakvu instituciju, ogledala se prije svega u činjenici da je neophodno stvoriti ambijent za nesmetano pokretanje ekonomskog sektora. Zadaci koji su se u tom trenutku postavljali pred „reformiste“ ogledali su se u prvom redu u postavljanju zahtjeva i normi te postavljanju pravila i statuta koji su karakterisali bankarske sisteme zemalja u okruženju. Bankarski sistem u BiH u poratnom periodu imao je jako lošu sliku, koju je karakterisala u prvom redu nelikvidnost bankarskih subjekata, veoma često bila je prisutna karakteristika nelikvidnosti istih.

Tadašnji bankarski sistem bio je u potpunosti u vlasništvu državnog sektora i u tom periodu veoma čest i gotovo normalan slučaj je bio namjeran nemaran odnos prema finansijskim sredstvima banke. Sve ovo navedeno može se okarakterisati kao jedna jako loša slika bankarskog sistema.

Kada posmatramo državu sa privrednog aspekta bitno naglasiti da ista ima za cilj da kroz implementaciju svoje uloge ostvari, koliko je moguće, veći rast ekonomije, pozitivna posljedica nakon navedenog je porast zaposlenosti koji za sobom povlači zasigurno bolji standard građana. Kompletne političko-ekonomske prilike u BiH u ranije navedenom periodu su u potpunosti bile remetilački faktor u pokušaju da se finansijske institucije postave na temelje kojim će normalno funkcionisati. Mišljenja sam da je u to vrijeme bila prisutna jedna doza opstrukcije vlasti u pogledu realnog razvoja bankarskog sektora, a svaka vlast koja ograničava razvoj potkopava svoje osnove opstanka, ne samo u srednjem već i u dugom roku, i u tome i jeste misterija razvoja, ne samo bankarskog sektora, već i svih ostalih sfera društvenog života u tranzicionim zemljama.

S obzirom na činjenicu da su stvoreni potrebni zakonski propisi i da se prevazišao taj „težak“ tranzicioni period danas bankarski sistem BiH predstavlja savremen sistem koji u potpunosti odgovara potrebama i zahtjevima društveno-političkog sistema. Danas bankarski sistem BiH predstavlja jedan potpuno stabilan bankarski sistem koji je u potpunosti kompatibilan sa bankarskim sistemima razvijenih zemalja, relativno dobro je usklađen sa zakonskim regulativama i normama koje proističu iz uslova postavljenih Sporazumom o stabilizaciji i pridruživanju.

Za očekivati je da Centralna banka Bosne i Hercegovine zakonski ojača svoju ulogu i time dobije na značaju pri provođenju zakonskih propisa u narednom periodu. Pored navedenog realno je za očekivati i ekonomski napredak države koji će doprinjeti uvećanju značaja Centralne banke Bosne i Hercegovine. Pored ekonomskog napretka njenu ulogu će takođe uvećati i sve češći međunarodni ugovori i predstojeće evroatlanske integracije.